



Selasa, 16 Januari 2024

Ogen : 2 Raja-raja 4:12-13



“Nggo Cukup keperluanku”



Kata “cukup” megati mesera mbelaskensa, apaika kerna keperluan nggeluh. Megati kurangsa nge akap rusur, sabap lit saja rusur si isuraken ngelitkensa.

Ngidah perbahanen diberu Sunem si mehuli man Elisa ras suruh-suruhenna, la akap Elisa metanggung adi kai pe la ibahanna selaku pengataken bujurna man diberu e ras keluarganya. E maka nungkun Elisa erkelangken suruh-suruhenna, kai atena si ipindona i bas Elisa nari, entah perlu kin Elisa ngadap man raja guna encukupi keperluan geluhna. Tapi, diberu Sunem mereken jabapen, ‘kerina keperluan geluhku enggo cukup dat aku i tengah-tengah bangsaku.’ Diberu Sunem e ngidah si lit i bas ia e enggo cukup guna ngelitken keperluan geluhna. Amin pe itawarken gelah banci isampati raja, la ialokenna peluang e.

Banci si idah maka biak si lit i bas diberu Sunem e la rangap. Si lit i bas ia e pe akapna enggo cukup. Lebih pe asa cukup, sabap ngasup nge ia nikapken si mehuli pe man serayan si reh ku rumahna. Biak si bage man pebelinen i bas pusuhta, janah ipraktekken i bas kegeluhen. Sigejapken kita lit i bas kecukupen, erbahansa kita ngasup ngataken bujur ras encidahken perbahanen nampati ku sekelewet. Adi lalap si akap kurang, tentu mberat kal i bas nampati. Penggejapen cukup, e pe mabai kita teneng rukur, ras teneng erdahin. Sehat perukuren, sehat kula ras sehat kiniteken. Jesus jine pe iajarina kita ertoto, ‘bereken man kami nakan cukup i bas wari si sendah enda.’ Ngatakensa kegeluhenta situhuna lit i bas pengaturen Tuhan, keperluan geluhna pe enggo iaturkenna alu cukup. Si perlu lit pengendesen dirinta man baNa, janah sibereken dirinta guna iaturken Tuhan. Kita erdahin segedang wari e sada tanggungjabapta, sabap Tuhanta e pe erdahin. Mari si belasken: ‘kerina keperlunku, enggo cukup.’